

DIT UN DAT

Fundsaken

Ik hebb körtens maal weer mien Bokenschapp dörken. Van all Schrieverskes un Schrievers, de wat mit Plattdüüts of Oostfreesland to doon hebben, ut de Histooreje un van vandaag hebb ik tominnst een Book, meest soogaar mehr. Besünners vööl weert sünd woll de Boken, in welke en paar Woorden van de Autor of Autorin an de Beschenke indragen sünd.

So hebb ik Boken mit Handteken van Oswald Andrae ut Jever, Marianne Brückmann, Ewald Christophers un Johannes Diekhoff ut Auerk, Hein Bredendiek un Heinrich Diers ut Ollnbörg, Frerich Hokema, Ludwig Kimme un Christof Wehking ut Nörden, Greta Schoon un Gerd Constapel ut Leer, Karin Peters ut Pewsum, Jan Meiners ut Ness un vööl annern mehr.

An de Warkeldagen van de Schrieverkring, de Warkkring van oostfreeske Schrieverskes un Schrievers in Vörjahr un Harvst un bi de Bevensen-Dagfahrt all Jahr in Septembermaant kunnen wi mit de Mitstrieders uns neje Boken tusken un mit en paar leve Woorden beteken.

Denn funn ik noch en Anzeig, dat en Froo Maria Kipp an de 5. Määrt 2001 mit 91 Jahren overleden was. De Familie harr anstee van de bekennte Dichterslüü Joseph Eichendorf, Heinrich Heine, Dietrich Bonhoefer un Rainer Maria Rilke en hoogdüütse Gedicht van mi over de Anzeig sett. Biserka Herlt-Bodalec harr mi de Anzeig tostüürt un schreven, se was blied, dat mien Poesie in de Minsken wat anrögen kunn. In dat Gedicht gung dat um dat Gefühl, dat de

Seel as in en frömde Land de Heimaad verloren hett.

Herlt-Bodalec harr dotieds dat Leid van dat Awo-Heim in Nörden un sük in heel Düütsland verdeent maakt um de Pleeg van Alzheimer-Patienten. Se is ok al 2011 mit blot 57 Jahren overleden.

Ok so um dat Jahr 2000 kwamm en Mitarbeiderske van dat Gesundheitsamt Auerk bi mi un schunk mi en Oosterei mit en Gedicht daarup, dat se up de Oostermarkt in Ihlow funnen harr. Christa Jaeger ut Auerk harr dat anboden. In heel fiene Letters harr se en plattdüütse Gedicht ut mien Book „Wor to Huus“ (SKN 1990) ofschreven.

In dat Gedicht fraag ik, „of ik Post harr van to Huus, of en Breev daar kwamm in Susus, of maal een woll an mi denkt, of woll een mien Stappen lenkt, of mi een seggt, wat ik sall, of...“

Ik mutt togeven, dat hett mi nu weer düchtig anröegt.

Hans-Hermann Briese